

Soim

laikpasin

TAIM Pop Jon Pol 2 i dai pinis, sia bilong Santu Pita i stap nating. Tasol ol Kadinel bilong Katolik Sios i makim Pop Benedict 16 na em i kamap nupela Pop. Long Epril 24, 2005, Pop Benedict 16 i mekim Misa long mama haus lotu bilong Katolik Sios long Rom na em i sindaun long sia bilong Santu Pita namba wan taim. Em i autim dispela gutpela tok long Misa.

"Dia ol pren bilong mi, long dispela taim i no gat nid bai mi autim wanpela progrem mi bai bihainim bilong lukautim sios. Mi bin tokaut pinis long sampela liklik aidia long we mi skelim wok bilong mi long toksave bilong mi long Trinde, Epril 20, na bihain mi gat sans long autim tingting bilong mi gen. Tasol mi ken tokaut strong nau, progrem tru bilong mi bilong stiaim sios i olsem, mi no inap bihainim laik bilong mi yet na mi no inap bihainim ol aidia bilong mi yet tu. Mi wantaim Sios olgeta bai opim yau bilong harim tok bilong Bikpela na bihainim laik bilong em wanpela tasol. Bikpela bai holim stia. Bikpela yet bai soim rot long sios long dispela aua long histori bilong yumi."

Long 50 Yia Jubili bilong Katolik Sios long Sauten Hailans i bin wokim gen Pastorel Plen bilong Daiosis bilong Mendi. Dispela plen i no nupela olgeta. Nogat. Em i sanap long ol pastoral plen bilong bipo. Tasol yumi bin luksave gen na glasim gut yumi sios yet wantaim sosaiti na ples we yumi stap long en. Yumi bin opim yau bilong yumi long harim tok bilong Bikpela na bihainim laik bilong em wanpela tasol. Olsem na yumi ken tok, "Yumi yet i sios i stap laip long Krai bilong soim laikpasin bilong Krai long graun olgeta."

Pop Benedict 16 i stap Papa Santu 10-pela mun pinis. Em yet, wantaim yumi sios, i bin opim yau bilong harim tok bilong Bikpela. Olsem na long Krismas de, Desemba 25, 2005, Pop Benedik 16 i salim wanpela pas long yumi sios bilong olgeta hap bilong

graun. Dispela em i namba wan pas Pop Benedik 16 i salim taim em i stap Pop. Nem bilong dispela pas em Deus Caritas Est. Mining bilong dispela astok em i olsem, God em i laikpasin. Pop i autim gen tok Aposel Jon i raitim long namba wan pas bilong em. "God yet em i as bilong pasin bilong laikim tru ol arapela. Na man i save laikim tru ol arapela em i pas wantaim God na God i pas wantaim em (1 Jon 4:16)."

Long pas God em i laikpasin (Deus Caritas Est), Pop Benedict 16 i tok-save olsem, bilip na laip na wok bilong yumi sios i gat tripela bikpela as long en, olsem:

- " autim tok bilong God,
- " selebretim ol sevenpela sakramen,

- " na mekim wok bilong siom laikpasin long ol arapela.

Planti taim yumi save tingting na tok-tok long autim tok bilong God na long selebretim ol 7-pela Sakramen. Tasol yumi save lusim tingting long ministri bilong laikpasin. Nupela pastora plen bilong yumi long Mendi Daiosis i tokaut long planti we bai yumi ken soim laikpasin long ol arapela, moa yet long ol tarangu na long ol manmeri husat i sot long sampela samting o i stap wanpis na i stap ausait long komuniti.

Em i gutpela sapos yumi olgeta i pulim tingting long dispela tok Pop Benedict 16 i autim long en na skelim yumi wan wan yet long hau yumi i ken mekim ministri bilong laikpasin i kamap strong long yumi sios. Oltaim yumi mas painim kain kain we long soim laikpasin, helpim narapela, bung wantaim long strongim laikpasin long komyuniti. Tok bilong God i save skulim na stiaim yumi sios. Ol sevenpela Sakramen i save strongim laip bilong Jisas Krai insait long yumi sios. Nau yumi mas i go aut na mekim gutpela pasin long olgeta manmeri na soim laikpasin bilong Krai long olgeta samting yumi mekim long en.